

## Section Nouvelle

## « LE PARISIEN »

Y'arrivot d'eine autre région de France et n'a jamais su manier l'langue ed'Mousseron, alors in l'app'la « le Parisien ». Né dins les vignes de Bourgogne où s'mère travailloit, il quitta s'région après avoir survécu aux 4 années de tranchées où l'armée française l'avot cloué avec sin frère pour eine gloire inutile. Ch'est par l'Escaut, not' fleuv' chéri tant canté par Verhaeren, qu'il arriva chez nous.

Y'avot gardé d'sa région l'amour de la nature et du grand air. Sin gardin ouvrier étot un « champ ouvrier » de par sa surface. J'adoros partir avec li cueillir les légumes qui s'trouvo'nt à 2 kms de l'mason. J' montos dins s'brouette avec min tiot panier qui d'vot contenir les fraises du gardin. In longeot de vieux murs fleuris de giroflées sauvaches si parfumées que ces vieill'es briques bourdonno'nt de « tiots biêtes » et de papillons colorés. Les corons d'mineurs aligno'nt leurs masons bein serrées les unes aux aut'es habitées d'nos héros méconnus, nos cafus. Le linch des lessif's claquot au vent et les effluves de café échappées des masons s'mélingeo'nt au savon de Marseille appelé « sinlich » par ma mère.

Enfin in arrivot dins un paradis de carrés colorés gérés par des allées d'thym et œillets d'inde si parfumés ! Pépé inl'vot sin paletot dins l'cabane in tôles garnie de bouquets d'ail et d'oignons pendants du têt. A nous les tiots pos et carottes que j'mingeot tout crus avant d'les déposer dins l'brouette ! Cha s'terminot par les fraises qui barbouillo'nt min minton et quand les hannetons bourdonno'nt aux oreill's et qu'eine brume déposot ses écharpes sul' gardin, chatot l'heu' de rentrer. La brouette pleine du labeur d'min jardinier, in rintrot les reins cassés et heureux de nos cueillettes pour not' famille. Je glissais m'tiot' main dins celle de pépé, main immense, calleuse du travail d'la terre mais si rassurante !

Où sont achteur les hannetons de la St-Jean ? Où sont les murailles parfumées des giroflées ?

Il faudrot armonter l'temps, oublier l'présent pou croire' au lendemain.